

N A C R T

Bosanski jezik

Z A K O N

O DOPUNAMA ZAKONA O ZAŠTITI OD POŽARA I VATROGASTVU

Sarajevo, septembar 2026. godine

PRIJEDLOG ZA DONOŠENJE ZAKONA O DOPUNAMA ZAKONA O ZAŠTITI OD POŽARA I VATROGASTVU PO HITNOM POSTUPKU

Predlaže se da se zakon o dopunama Zakona o zaštiti od požara i vatrogastvu razmatra i donese po hitnom postupku u skladu sa odredbama čl. 192. do 196. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07, 2/08 i 26/20) i čl. 186. i 187. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br. 27/03, 21/09 i 24/20).

Naime, odredbom člana 186. Poslovnika o radu Doma naroda i člana 192. Poslovnika Predstavničkog doma Parlamenta Federacije BiH propisano je da se zakon po hitnom postupku može donijeti samo kada se njime uređuju odnosi i pitanja čije uređenje ne trpi odlaganje, odnosno kada postoji neodložna potreba i kada bi donošenje zakona u redovnom postupku moglo izazvati štetne posljedice po Federaciju Bosne i Hercegovine, sigurnost građana ili funkcionisanje javnih službi.

Donošenje ovog zakona po hitnom postupku u potpunosti je opravdano iz sljedećih razloga:

1. Neodložnost potrebe - Specifičnost poslova i sprečavanje narušavanja operativne spremnosti

Poslovi profesionalnih vatrogasaca i starješina vatrogasnih jedinica spadaju u poslove od posebnog značaja za zaštitu života i zdravlja ljudi, materijalnih dobara i okoliša. Obavljanje ovih poslova karakterišu posebni uslovi rada, povećana opasnost po život i zdravlje, te svakodnevna izloženost ekstremnim temperaturama, gustom dimu, otrovnim plinovima i teškim fizičkim naporima u nepredvidivim i rizičnim situacijama koje zahtijevaju visok stepen psiho-fizičke spremnosti i brze reakcije.

Međutim, postojeći normativni okvir ne obezbjeđuje adekvatno vrednovanje dugogodišnjeg rada u takvim uslovima prilikom ostvarivanja prava na penziju. Trenutno se značajan broj iskusnih profesionalnih vatrogasaca nalazi pred ispunjavanjem uslova za penziju ili im je radna sposobnost narušena usljed povreda zadobijenih na radu. Nastavak primjene opštih uslova penzionisanja dovodi do situacije da vatrogasci sa narušenim zdravljem moraju ostajati u operativnim jedinicama ili odlaziti u penzije sa iznosima koji ne obezbjeđuju osnovnu egzistenciju, što stvara neodložnu potrebu za urgentnim uspostavljanjem pravednijeg i povoljnijeg pravnog okvira.

2. Sprečavanje štetnih posljedica po Federaciju BiH i javnu sigurnost

Ukoliko se ovaj zakon ne bi donio po hitnom postupku, prolongiranje u redovnoj parlamentarnoj proceduri (koja traje više mjeseci) prouzrokovalo bi direktne štetne posljedice po sistem zaštite i spašavanja u Federaciji BiH:

- Ugrožavanje funkcionalnosti i operativnosti vatrogasnih jedinica: Zbog neregulisanog i nepovoljnog penzijskog statusa dolazi do dugotrajnih bolovanja, odsustva sa rada, demoralizacije i napuštanja službe od strane deficitarnog i visokoobučenog kadra. To izravno slabi kapacitete općinskih, gradskih i kantonalnih jedinica za reagovanje u vanrednim situacijama i tokom požarnih sezona.
- Otklanjanje diskriminacije u odnosu na srodne službe: Profesionalni vatrogasci, koji djeluju kao prvi odgovor u akcijama zaštite i spašavanja ljudi i materijalnih dobara zajedno sa policijskim službenicima, dovedeni su u neravnotežan položaj u pogledu penzijskih uslova. Dalje odlaganje

harmonizacije ovih prava produžava sistemsku nepravdu i stvara opravdano nezadovoljstvo unutar operativnih snaga zaštite i spašavanja.

- Zaštita lica sa narušenom radnom sposobnošću: Hitno donošenje Nacrta zakona omogućava da se predloženi povoljniji način obračuna penzije (na osnovu pet najpovoljnijih godišnjih plaća i utvrđivanja posebnih uslova) počne primjenjivati bez odlaganja, posebno na vatrogasce koji su proglašeni invalidima usljed povreda zadobijenih neposrednim izvršavanjem službenih zadataka.

3. Minimalan i kontrolisan uticaj na Budžet Federacije BiH

Predložene dopune uvođenjem posebnosti pri obračunu penzija obuhvataju usku i jasno definisanu kategoriju operativnih radnika i starješina, te ne zahtijevaju kompleksna prilagođavanja niti obimna budžetska izdvajanja koja bi ugrozila fiskalnu stabilnost Federacije BiH. Eventualna šteta nastala usljed zastoja ili slabljenja kapaciteta sistema zaštite od požara bila bi nesrazmjerno veća po imovinu, privredu i sigurnost građana Federacije BiH.

Imajući u vidu prirodu i težinu poslova profesionalnih vatrogasaca i starješina vatrogasnih jedinica, postojanje neodložne potrebe za rješavanjem njihovog socijalnog i penzijskog statusa, kao i opasnost od nastanka štetnih posljedica po funkcionisanje javnih službi zaštite i spašavanja u Federaciji BiH ukoliko bi se primijenio redovni postupak, smatra se u potpunosti opravdanim da se ovaj zakon razmatra i donese po hitnom postupku.

Z A K O N

O DOPUNAMA ZAKONA O ZAŠTITI OD POŽARA I VATROGASTVU

Član 1.

U Zakonu o zaštiti od požara i vatrogastvu („Službene novine Federacije BiH“, br. 64/09 i 77/25), iza člana 113. dodaje se novi član 113a. koji glasi:

“Član 113a.

- (1) Profesionalni vatrogasac i starješina vatrogasne jedinice koji neposredno obavljaju operativne poslove vatrogastva, pravo na penziju ostvaruju u skladu sa Zakonom o penzijskom i invalidskom osiguranju („Službene novine Federacije BiH“, br. 13/18, 93/19 - odluka US, 90/21, 19/22 i 42/23 - odluka US, „Službeni glasnik BiH“, br. 43/24 - odluka US BiH i „Službene novine Federacije BiH“, br. 47/24, 19/25 i 6/26) i ovim zakonom, pod uslovima da:
 - a) ima neprekidno najmanje 15 godina staža osiguranja u statusu profesionalnog vatrogasca i starješine vatrogasne jedinice i
 - b) u vrijeme sticanja prava na penziju ima status profesionalnog vatrogasca i starješine vatrogasne jedinice.
- (2) Profesionalnom vatrogascu i starješini vatrogasne jedinice iz stava (1) ovog člana, lični koeficijent za ostvarivanje prava na penziju utvrđuje se na osnovu pet godišnjih plaća ostvarenih u statusu profesionalnog vatrogasca i starješine vatrogasne jedinice, koje su najpovoljnije.
- (3) Odredbe stava (2) ovog člana odnose se i na profesionalnog vatrogasca i starješinu vatrogasne jedinice koji usljed zadobijenih povreda na radu uzrokovanih neposrednim obavljanjem poslova i zadataka, bude proglašen invalidom I kategorije.“

Član 2.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

OBRAZLOŽENJE NACRTA ZAKONA O DOPUNAMA ZAKONA O ZAŠTITI OD POŽARA I VATROGASTVU

I - USTAVNOPRAVNI OSNOV ZA DONOŠENJE ZAKONA

Ustavni osnov za donošenje ovog zakona je odredba člana IV. 20. (1) d) Ustava Federacije Bosne i Hercegovine, kojom je predviđeno da Parlament Federacije Bosne i Hercegovine donosi zakone o vršenju funkcija federalne vlasti. Kako se ovim zakonom reguliše materija čija je osnovna funkcija zaštita života i zdravlja ljudi i imovine od požara, proizilazi da je u ovom slučaju ispunjen uslov iz odredaba poglavlja II. član 2. (1) a) i k) Ustava. Prema toj ustavnoj odredbi Federacija BiH je dužna osigurati primjenu najvišeg nivoa međunarodno priznatih prava i sloboda, pa Federacija BiH, po tom osnovu, ima pravo donijeti ovaj zakon i njime stvoriti uslove da se na području cijele Federacije BiH, pod istim uslovima, može organizovati i provoditi zaštita života i zdravlja ljudi i imovine od požara.

Osim toga, ustavni osnov za donošenje ovog zakona su i odredbe poglavlja III, član 2. tačka a) i c) Ustava Federacije BiH, jer se i one odnose na zaštitu i provođenje ljudskih prava (u ovom slučaju pravo na život i zdravlje ljudi) i provođenje politike zaštite čovjekove okoline. U ovom slučaju radi se o zaštiti okoline od požara, jer se požar može pojaviti na svim mjestima i prostorima cijele Federacije BiH i svojim djelovanjem ugroziti čovjekovu okolinu.

Prema tome, očigledno je da navedene ustavne odredbe predstavljaju ustavni osnov da Parlament Federacije BiH, na osnovu poglavlja IV. član 20. (1) d) Ustava Federacije BiH, donese ovaj zakon.

Navedeni ustavni osnov već je poslužio za donošenje Zakona o zaštiti od požara i vatrogastvu („Službene novine Federacije BiH“, br. 64/09 i 77/25).

II - RAZLOZI ZA DONOŠENJE ZAKONA I OBRAZLOŽENJE ODABRANE POLITIKE

Donošenje ovog zakona predlaže se radi unapređenja i potpunijeg uređenja radno - pravnog i socijalnog položaja profesionalnih vatrogasaca i starješina vatrogasne jedinice koji neposredno obavljaju operativne poslove vatrogastva, posebno u dijelu ostvarivanja prava iz penzijskog i invalidskog osiguranja.

Poslovi profesionalnog vatrogasca i starješine vatrogasne jedinice spadaju u poslove od posebnog značaja za zaštitu života i zdravlja ljudi, materijalnih dobara i okoliša. Obavljanje ovih poslova karakterišu posebni uslovi rada, povećana opasnost po život i zdravlje, jer su svakodnevno izloženi visokim temperaturama, gustom dimu, otrovnim plinovima, fizičkim naporima te nepredvidivim i rizičnim situacijama koje mogu imati trajne posljedice po njihov život i zdravlje, kao i potreba za neposrednim reagovanjem u situacijama koje zahtijevaju visok stepen fizičke i psihičke spremnosti.

Posebnost i težina poslova profesionalnih vatrogasaca već su prepoznate važećim Zakonom o zaštiti od požara i vatrogastvu, kojim je za profesionalne vatrogasce i starješine profesionalnih vatrogasnih jedinica koji obavljaju operativne

poslove vatrogastva propisano računanje staža osiguranja sa uvećanim trajanjem i kolektivno osiguranje.

Također, zbog posebnih uslova rada, težine, prirode posla i odgovornosti, važećim zakonom predviđeno je i uvećanje plaće za profesionalne vatrogasce i starješine profesionalnih vatrogasnih jedinica.

Predloženim dopunama nastoji se osigurati da se posebnost i težina poslova profesionalnih vatrogasaca i starješina vatrogasnih jedinica adekvatno odraze i u ostvarivanju prava na penziju. Dugogodišnje neposredno obavljanje operativnih poslova vatrogastva pod posebnim i otežanim uslovima može imati značajan uticaj na radnu sposobnost, zdravstveno stanje i mogućnost nastavka obavljanja ovih poslova u kasnijoj životnoj dobi. Zbog toga je opravdano uspostaviti poseban način ostvarivanja prava na penziju za lica koja su značajan dio svog radnog vijeka provela u statusu profesionalnog vatrogasca i starješine vatrogasne jedinice koji neposredno obavljaju operativne poslove vatrogastva odnosno poslove vatrogasne djelatnosti.

Prema tome, upravo zbog posebnih uslova rada i stalne izloženosti opasnostima pri obavljanju operativnih i drugih poslova, radno mjesto profesionalnih vatrogasaca i starješina vatrogasnih jedinica opravdava povoljnije pravo na penziju kao oblik zaštite i društvenog priznanja za njihov doprinos sigurnosti zajednice.

Odredbom člana 1. Nacrta zakona, utvrđuje se da profesionalni vatrogasac i starješina vatrogasne jedinice koji neposredno obavljaju operativne poslove vatrogastva mogu ostvariti pravo na penziju pod posebnim uslovima, uz obavezu da su najmanje 15 godina staža osiguranja ostvarili u statusu profesionalnog vatrogasca i starješine vatrogasne jedinice, te da u vrijeme sticanja prava na penziju imaju odgovarajući status. Na ovaj način pravo se vezuje za stvarno i dugotrajno obavljanje profesionalnih vatrogasnih poslova, čime se osigurava da se predložena pogodnost odnosi na lica koja su najveći dio svog radnog angažmana provela na poslovima koji zbog svoje prirode predstavljaju poseban rizik i opterećenje. Također, posebno se predlaže da se za profesionalnog vatrogasca i starješinu vatrogasne jedinice izračun ličnog koeficijenta za ostvarivanje prava na penziju vrši na osnovu pet godišnjih plaća ostvarenih u statusu profesionalnog vatrogasca i starješine vatrogasne jedinice koje su za osiguranika najpovoljnije. Ovakvo rješenje ima za cilj da se prilikom ostvarivanja prava na penziju uzme u obzir period u kojem je profesionalni vatrogasac i starješina vatrogasne jedinice ostvarivao najpovoljnija primanja u okviru svog profesionalnog vatrogasnog angažmana, odnosno da se dugogodišnji rad u posebno teškim i rizičnim uslovima adekvatnije odrazi na visinu ostvarene penzije.

Posebna zaštita predviđena je i za profesionalnog vatrogasca i starješinu vatrogasne jedinice koji, usljed povrede na radu nastale neposrednim obavljanjem poslova i zadataka, bude proglašen invalidom I kategorije. U takvim slučajevima, zbog činjenice da je invalidnost neposredna posljedica obavljanja posebno opasnih i zahtjevnih poslova, opravdano je omogućiti primjenu povoljnijeg načina obračuna penzije, bez obzira na to što osiguranik zbog nastale invalidnosti nije mogao ostvariti puni radni vijek u statusu profesionalnog vatrogasca i starješine vatrogasne jedinice.

Imajući u vidu naprijed navedeno, predloženo rješenje predstavlja vid posebnog vrednovanja profesionalnog vatrogasnog rada i ima za cilj stvaranje pravednijeg odnosa između posebnih uslova i rizika kojima su profesionalni vatrogasci izloženi tokom radnog vijeka i prava koja ostvaruju nakon prestanka radne aktivnosti.

Odredbom člana 2. Nacrta zakona, definiše se stupanje na snagu Zakona.

III - USKLAĐENOST PROPISA SA EVROPSKIM ZAKONODAVSTVOM

Predmetnim propisom ne vrši se prenošenje niti usklađivanje sa pravnom stečevinom Evropske unije, budući da materija posebnih uslova za ostvarivanje prava na penziju profesionalnih vatrogasaca i starješina vatrogasnih jedinica nije neposredno uređena obavezujućim aktima Evropske unije koji bi zahtijevali posebno usklađivanje domaćeg zakonodavstva.

IV - PROVEDBENI MEHANIZMI I NAČIN OSIGURANJA POŠTIVANJA PROPISA

Postupak ostvarivanja prava na penziju provodit će se kod nadležnog nosioca penzijskog i invalidskog osiguranja, Federalnog zavoda za penzijsko i invalidsko osiguranje, u skladu sa Zakonom o penzijskom i invalidskom osiguranju. Postupci za ostvarivanje prava na penziju profesionalnih vatrogasaca i starješina vatrogasnih jedinica koji nisu pravosnažno okončani do dana stupanja na snagu ovog zakona okončat će se prema odredbama ovog zakona, ako je to za osiguranika povoljnije. Federalni ministar rada i socijalne politike, uz prethodno mišljenje Federalnog zavoda za penzijsko i invalidsko osiguranje, uskladit će podzakonske akte čije je usklađivanje potrebno za provedbu ovog zakona u roku od 60 dana od dana njegovog stupanja na snagu.

Nadzor nad provođenjem zakona je u nadležnosti Federalnog ministarstva rada i socijalne politike, upravne inspekcije Federalnog ministarstva pravde i Federalne uprave za inspekcijske poslove, svako u okviru svoje nadležnosti.

V - OPIS KONSULTACIJA VOĐENIH U PROCESU IZRADE PROPISA

Dana 11.08.2026. godine ova uprava je zaprimila Inicijativu za hitno pokretanje procedure izmjena i dopuna Zakona o zaštiti od požara i vatrogastvu („Službene novine Federacije BiH“, br. 64/09 i 77/25). U aktu se navodi da je dana 28.07.2026. godine održan sastanak u prostorijama Profesionalne vatrogasne jedinice u Sarajevu, na kojem su prisustvovali vatrogasci iz cijele Federacije BiH. Sastanak je održan sa jednim zajedničkim ciljem a to je poboljšanje statusa i mirovina vatrogasaca u Federaciji BiH. Navodi se da profesionalni vatrogasci pri ostvarivanju prava iz penzijskog i invalidskog osiguranja nisu prepoznati kao posebna kategorija, a da obavljajući jedan od najtežih poslova, izlažu svoju vlastitu sigurnost, život i zdravlje, a u plemenitom cilju zaštite zdravlja i života građana i njihove imovine. Traži se povoljniji izračun penzija na identičan način koji u Federaciji BiH imaju policijski službenici te je i dostavljen prijedlog člana kojim bi se navedeno regulisalo. Također, u prostorijama Federalne uprave civilne zaštite dana 11.08.2026. godine održan je sastanak privremeno postavljenog direktora ove uprave sa predstavnicima profesionalnih vatrogasnih jedinica u Federaciji Bosne i Hercegovine i direktorom Kantonalne uprave civilne zaštite Kantona Sarajevo, na kojem je razmatrana inicijativa za unapređenje statusa profesionalnih vatrogasaca, posebno u oblasti penzijskog osiguranja. Istaknuta je posebna složenost, opasnost i odgovornost poslova koje profesionalni vatrogasci svakodnevno obavljaju, kao i njihov značaj u zaštiti života, zdravlja i imovine građana.

Nadalje, aktom broj: 01-639/26 od 12.08.2026. godine, Samostalni sindikat državnih službenika i namještenika u organima državne službe, sudskoj vlasti i javnim ustanovama u Federaciji BiH je, nakon obavljenih konsultacija sa članovima sindikata Profesionalne vatrogasne brigade Sarajevo i članovima sindikata svih profesionalnih vatrogasnih jedinica u Federaciji, dostavio inicijativu za unapređenje

statusa profesionalnih vatrogasaca, sa posebnim osvrtom na oblast penzijskog osiguranja.

U skladu sa odredbama člana 9. Uredbe o pravilima za učešće zainteresirane javnosti u postupku pripreme federalnih pravnih propisa i drugih akata („Službene novine Federacije BiH“, broj 51/12), ova uprava će sprovesti postupak konsultacija sa zainteresiranom javnosti. Pozivom ove uprave dostavljenim svim kantonalnim upravama civilne zaštite, jedinicama lokalne samouprave putem Saveza općina i gradova Federacije BiH i zainteresiranoj javnosti omogućeno je preuzimanje Nacrta zakona, kao i obrasca sa uputstvom za dostavljanje komentara i prijedloga dopuna, putem zvanične web stranice ove uprave.

Kantonalne uprave civilne zaštite, jedinice lokalne samouprave i zainteresirana javnost će biti pozvani da, najkasnije do 21.09.2026. godine, dostave svoje primjedbe, komentare i prijedloge dopuna putem propisanog obrasca. Tokom perioda konsultacija svi dostavljeni prijedlozi će biti razmotreni, a prijedlozi koji budu prihvaćeni će se ugraditi u odgovarajuće odredbe Nacrta zakona, a za prijedloge koji ne budu prihvaćeni dat će se jasno obrazloženje. Provedene konsultacije će omogućiti uključivanje svih relevantnih aktera u proces pripreme Nacrta zakona i time će se doprinijeti kvalitetnijem i sveobuhvatnijem definisanju rješenja sadržanih u ovom zakonu.

VI - PROCJENA EKONOMSKE OPRAVDANOSTI DONOŠENJA PROPISA

Donošenje ovog propisa ekonomski je opravdano imajući u vidu potrebu unapređenja i efikasnijeg uređenja oblasti koja je predmet regulisanja, kao i obezbjeđenja adekvatnih uslova za njegovo provođenje u praksi.

Primjena propisa zahtijeva angažovanje dodatnih finansijskih, materijalnih i drugih resursa, koji nisu u cijelosti obuhvaćeni trenutno odobrenim budžetskim sredstvima. Potreba za obezbjeđenjem dodatnih budžetskih sredstava proizlazi iz novih obaveza i aktivnosti koje će nastati njegovim stupanjem na snagu, odnosno iz potrebe da se postojeći kapaciteti usklade sa novim zakonskim i drugim propisanim rješenjima.

Iako donošenje propisa u kratkoročnom periodu predstavlja dodatno finansijsko opterećenje za Budžet Federacije Bosne i Hercegovine, očekivani efekti njegove primjene opravdavaju nastale troškove. Provođenjem propisa osigurat će se efikasnije ostvarivanje utvrđenih prava i obaveza, unaprijediti institucionalni i operativni kapaciteti, te smanjiti rizici koji bi mogli nastati usljed neadekvatnog finansiranja i neprovođenja propisanih mjera.

Posebno se ima u vidu da bi izostanak obezbjeđenja potrebnih finansijskih sredstava mogao dovesti do otežanog ili neujednačenog provođenja propisa, odnosno do stvaranja dodatnih obaveza i troškova u budućem periodu. Stoga se obezbjeđenje dodatnih budžetskih sredstava smatra nužnim za potpuno, blagovremeno i efikasno provođenje propisa.

Ekonomska opravdanost donošenja propisa ogleda se, dakle, u činjenici da će se ulaganjem dodatnih budžetskih sredstava stvoriti pretpostavke za kvalitetnije i efikasnije ostvarivanje ciljeva propisa, uz istovremeno smanjenje mogućnosti nastanka većih finansijskih posljedica u budućnosti.

U skladu s navedenim, procjenjuje se da su koristi i pozitivni efekti koji će proizaći iz primjene propisa veći od finansijskih izdataka potrebnih za njegovo provođenje, zbog čega se donošenje propisa smatra ekonomski opravdanim.

VII - OBRAZLOŽENJE FINANSIJSKIH SREDSTAVA ZA PROVOĐENJE PROPISA I FINANSIJSKI EFEKTI PROPISA

Za provođenje ovog propisa potrebno je obezbijediti dodatna budžetska sredstva, s obzirom na to da sredstva trenutno planirana u Budžetu Federacije Bosne i Hercegovine nisu dovoljna za potpuno finansiranje svih obaveza i aktivnosti koje proizlaze iz predloženih rješenja.

Dodatna finansijska sredstva bit će neophodno planirati i obezbijediti u okviru Budžeta Federacije Bosne i Hercegovine za potrebe izvršavanja obaveza utvrđenih ovim propisom, u skladu sa stvarnim obimom obaveza i dinamikom njihovog nastanka.

Finansijski efekti propisa ogledaju se prvenstveno u povećanju rashoda iz Budžeta Federacije Bosne i Hercegovine, odnosno u potrebi obezbjeđenja dodatnih sredstava za finansiranje obaveza koje će nastati njegovom primjenom. Visina potrebnih sredstava zavisiće od konačnog obima obaveza, broja korisnika, dinamike provođenja propisa, kao i drugih relevantnih elemenata koji će biti poznati nakon njegovog stupanja na snagu.

Međutim, uzimajući u obzir okvirne procjene broja korisnika koji bi ostvarili pravo na penziju, kao i procijenjeno povećanje mjesečnog iznosa penzije u odnosu na postojeće stanje, procjenjuje se da bi za izvršavanje obaveza bilo potrebno osigurati dodatna finansijska sredstva u Budžetu Federacije Bosne i Hercegovine u okvirnom iznosu od **430.000,00 KM**.

Navedeni iznos predstavlja procjenu te su moguća odstupanja, u zavisnosti od konačnih podataka o broju lica koja će ostvariti pravo na penziju.

Za potrebe planiranja budžetskih sredstava, Federalni zavod za penzijsko i invalidsko osiguranje će izvršiti detaljnu procjenu potrebnih finansijskih sredstava i iste uključiti u prijedloge finansijskih planova i Budžeta Federacije Bosne i Hercegovine za naredni period. Ukoliko sredstva za provođenje propisa nisu u cijelosti obezbijeđena u okviru trenutno usvojenog Budžeta Federacije Bosne i Hercegovine, ista će se obezbijediti kroz preraspodjelu sredstava, izmjene i dopune Budžeta Federacije Bosne i Hercegovine, odnosno kroz planiranje potrebnih sredstava u narednim budžetskim godinama, u skladu sa propisima kojima se uređuje budžetski sistem.

Donošenje propisa stoga ima direktan finansijski efekat na Budžet Federacije Bosne i Hercegovine, koji se ogleda u potrebi za povećanjem rashoda u dijelu koji se odnosi na provođenje novih zakonskih obaveza. Međutim, navedeni finansijski efekat predstavlja opravdan i potreban izdatak radi ostvarivanja ciljeva propisa i obezbjeđenja njegovog potpunog i efikasnog provođenja.

Prilikom planiranja potrebnih sredstava potrebno je voditi računa o principima ekonomičnosti, efikasnosti i efektivnosti korištenja javnih sredstava, kao i o mogućnostima Budžeta Federacije Bosne i Hercegovine. Sredstva će se koristiti namjenski, u skladu sa važećim propisima i odobrenim budžetskim pozicijama.

Imajući u vidu navedeno, za provođenje propisa potrebno je obezbijediti dodatna budžetska sredstva u iznosu koji će biti utvrđen na osnovu detaljnog obračuna finansijskih obaveza koje proizlaze iz njegovih odredbi. Obezbijeđenje navedenih sredstava predstavlja neophodan preduslov za potpuno i pravovremeno provođenje propisa.

VIII - RASPORED EVENTUALNOG PONOVOG PREISPITIVANJA DONESENOG PROPISA

Preispitivanje donesenog propisa vršit će se kontinuirano, u toku njegove primjene, a svako u okviru svoje nadležnosti.

IX - MIŠLJENJA NADLEŽNIH ORGANA

Ured za zakonodavstvo i usklađenost sa propisima Evropske unije je aktom broj:

Federalno ministarstvo finansija je aktom broj:

Federalno ministarstvo pravde je aktom broj: